

國立北京大學研究
院文史叢刊第一種

崇禎存實疏鈔

卷七下

THE UNIVERSITY OF CHICAGO PRESS

戶科給事中臣呂黃鍾謹

題爲革弊務絕其源論罪宜覈其實以褫釐剔之

聖政以快畏懷之輿情事竊惟

朝廷之大政有貳一日利弊之興除一日功罪之誅賞關係蓋甚重焉

皇上御極以來撻剔弊竇無一事之不嚴創艾罪人無一青之曲貸良以弊盡絕而利益始興罪罔宥而功能始奮可想聖慮之淵深矣然臣見近年以來祛弊而弊孔轉多治罪而犯罪反易者何也則以

明威之下防弊之流而非清弊之源稍罪之口而未服罪之心幾令作弊者掩護愈工畏罪者手足罔措我

皇上懲前毖後之至意竟成虛願矣臣以爲革弊之法不在嚴

索於既往而在明飭於將來前此葛藤盡爲斬斷自今以
往宜令各衙門將向來弊竇一一明白開陳不許絲毫隱
漏且嘉與更新弗追既往庶在公者旣感於前愆之得寬
又凜於將來之莫贖欺蒙盡去而弊源始可清也不然窮
治於潰極之餘其不及窮治者又不知凡幾將臣工以回
護爲救過而欺蒙日甚所謂葛藤宜斷者此也臣又以爲
論罪之法不在苛責其一癥而在詳覈其本末一切羅織炤以
宸鑒自今以往宜令各衙門將緊要罪案一一據實察

奏不許風影入

告且獄情旣乎無求深刻庶罹法者旣悔其自作之莫追又服
其霆擊之無心沉冤盡洗而罪人始瞑目也不然播弄於
影響之口其乘間播弄者又不知凡幾將宵人以彌縫爲

得計而大姦愈脫所謂羅織宜寬者此也兩者之中論罪尤要人之身名性命繫屬匪輕古帝王好生欽恤良有以也臣近見曲沃縣知縣余一鯢以擅殺官軍革職究擬矣就裏情事臣未深知但思官軍以衛民而來民方見德不暇有何私憾而殺之萬一真係亂軍或賊偽裝官軍俾官民俱不敢問恐將來惕於

功令之嚴以致開門揖盜爲臨縣遼州之續者更多矣流毒釀禍曷有底止不亦深可畏哉則論罪當慎匪直爲一鯢祝網已也凡此清弊之源覈罪之實皆關於

國是人心之大伏惟

聖明鑒裁施行

崇禎陸年正月貳拾肆日

貳拾陸日奉

聖旨別弊釐姦正欲懲前必後若果欺蒙日甚大姦愈脫你每
科道官何不指實叅來且讞獄明允屢旨申飭何謂羅織余
一鯢事情俟撫按究明自有裁奪不必臆揣該部知道

兵部尚書臣張鳳翼等謹

題爲夷情事職方清吏司案呈奉本部送據大同總兵今降
伍級戴罪管事王國靖塘報崇禎陸年正月拾叁日據管
北東路叅將事副將魯胤昌稟稱本年正月拾貳日據路
屬鎮羌堡守備程君賜稟稱卑職本月拾壹日辰時前往
得勝堡候盤倉糧行至半途適遇本堡邊貳拾捌墩傳烽
寫字麻大壘口稟初拾日夜叁更時約有賊夷數名從貳
拾捌墩東空貳拾柒墩西空拏去牛馬叁隻已出邊外
卑職隨審既知叁更時賊拏偷牛到牆何不一面拒堵一
面飛馳傳報以便追截這時賊已出邊去訖方纔稟報大
壘緘口無言卑職隨卽細察該墩情形稟稱原係拒牆堡
地方高家窯子高國圪親至到彼言說趕去大小牛肆隻

青驪馬壹匹卽察卑職所管墩臺貳拾捌座沿長貳拾貳里零伍拾步中恐邊軍怠玩每壹拾肆墩添設壹提邊把總壹監邊家丁頭目各壹名猶恐疎虞每兩墩仍設食行糧管隊壹名叅令伍申嚴加防禦不啻外今據該墩傳烽寫字麻大壘口稟初拾日夜叅更時賊出邊而延至拾壹日辰時途間方稟似屬違誤除將麻大壘併墩頭人役王月等羈禁聽示外等情具稟到職據此察報聞本年正月拾玖日辰時又據北西路叅將李煌報稱本年正月拾捌日辰時據拒門堡監邊把總劉安邦稟稱本堡守備陳善奉北路陳通判因助馬邊降夷事提去弘賜堡聽審今正月拾捌日寅時據本邊拾貳墩軍人袁祿等口報本墩從北跑來窮夷拾餘名扒牆作歹小的卽赴本墩與同墩軍

拒堵被夷射傷軍人宋海妻樊氏各夷看見牆上有人卽
往西北去訖緣係鼠竊窮夷並無掠去人畜亦無別情具
稟到職據此看得賊夷作歹旣經拒堵並無進牆樊氏何
得射傷中間必有隱弊況未傳烽料不知覺卑職隨卽馳
赴本邊拾貳墩驗得軍人宋海打傷海妻樊氏射死岳三
左腿砍傷察得本墩却無入牆痕跡跟蹤細察原從拾伍
墩西空扒牆進入將本墩軍楊名等捌名衣服盡行脫去
當將楊名拴住禕至拾肆拾叁兩墩見軍士俱在墩頂未
入墩內到至拾貳墩進入越城致將墩軍宋海夫妻打傷
射死岳三左腿砍傷見得各墩軍士吆叫仍從原進拾伍
墩西空出邊委無掠去人畜亦無別項情弊切炤東西多
事節奉上文嚴謹邊備加意設防屢經牌文申飭何啻再

四而守邊官軍因循玩慢以致疎虞除將監邊把總支更軍士細打示懲事干邊情除行沿邊各堡守操比往倍加嚴防外等情具稟到職據此看得插使未來之先沿邊窮夷凜凜畏法數月之間未嘗有絲毫之竊也自田筆寫氣拂意而去不拾日而賊夷卽兩竊矣則其陰謀詭計不問可知除會同監視劉文忠及行沿邊將備等官一一嚴加隄備外爲此理合塘報等因到部送司案呈到部看得奴插告警邊備宜嚴乃各堡賊夷掠去牛馬甚有剝墩軍之衣服棒之而走越參肆墩而又射砍傷人略無堵剿者則玩縱甚矣其云竝無掠去人畜之說果足信乎各該守備俱不得辭其責矣若通判之提去陳善以致離信果否急事宜

勅下巡按御史察明者也既經塘報前來理合具本題
知

崇禎陸年正月貳拾肆日

貳拾陸日奉

聖旨邊備屢旨嚴飭乃兩路賊夷殺掠人畜全無勦禦該管將
領疎玩殊甚其失事當不止此併陳通判提審陳善奉何明
文俱著巡按御史確察奏奪不許隱徇

兵部尚書臣張鳳翼等謹

題爲塘報失城復城情形併請嚴糾有司以儆將來事職方
清吏司案呈奉本部送准宣大總督張宗衡塘報職躬歷
行間專事追勦城守事宜勢難兼顧節經嚴飭固守不啻
舌敝頰禿頃於正月初陸日據清軍帶管分巡冀寧道副
使嘗道立詳報正月初貳日卯時據榆社縣報稱崇禎伍
年拾貳月貳拾柒日據本縣民李進文從遼州逃回口稟
文在州城內本月貳拾肆日伍鼓賊從東北角登城砍死
巡城夫役舉火燒毀城樓人心驚散遂將城門砍開大勢
擁入州城內外盡行占據賊令文城外挑水因便潛逃回
縣等情口稟該縣塘報到道相應請報等因本日又據督
統各營在事官兵原任總兵尤世祿塘報切職本月貳拾

日沁水縣黑油村之捷已經塘報外孽寇未淨不暇停鞍
統督各營躡蹤跟追紫金樑邢紅狼等賊貳拾壹日追至
陽城縣玖拾里貳拾貳日追至澤州城玖拾里貳拾叁日
追至高平縣捌拾里貳拾肆日追至長子縣玖拾里貳拾
伍日追至屯留縣陸拾里官丁愈追愈奮狡賊轉懼轉奔
卽求壹隙之暇秣馬而不可得死怕大兵晝夜疾行壹貳
百里鼠竄大山連日兼程人馬憊甚甫與各將決計入山
追勦間忽據鄉民李從善報稱西賊壹股闖將入金剛過
天星等犯武鄉縣地方已焚西關欲攻遼州等情職聞警
熟思職所尾之賊係紫金樑等而闖將等係西河之賊不
知何故放鬆令其蹂躪東向惟恐有破巢覆卵之患於是
不暇顧所尾之賊急擬走遼州應援以全疆土貳拾陸日

兵馬星馳抵襄垣縣玖拾里貳拾柒日抵武鄉縣地方紅
水村玖拾里距州止柒拾里據本村鄉民杜加祿報稱遼
州已破職卽傳令各將星夜起營圍城貳拾捌日伍鼓職
督各營兵馬直抵城下肆面安頓營盤諭以環攻若步兵
晝夜趕到瞬息恢復伊城以雪壹州

天

地神人共憤另行馳報等因塘報間本月初柒日辰時據尤世

祿報爲督統各營攻城勦寇斬獲功級以奏恢復州城事
切職拾貳月貳拾捌日統督各營兵馬伍更直抵城下諭
以環攻第攻城與臨敵不同必分派信地而後各將有專
責無推委也又傳令各營官兵如破城擅斬良民者償命
各營將領俱遵依訖隨會同監視標下執旗把牌王承詔
駱文昇守備趙守智李守義劉登選劉登甲中軍守備王

懷仁旗鼓守備劉應魁加銜守備孟子訓趙桂芳史冊高
寧沈維王學金燦蔡穩張志魁李文魁蘇福楊進孝劉文
禮劉福曹文炳李夏冉世傑王邦爵陳堂原任守備籍真
千總張應魁王科張登舉劉進才李忠陳文登傳示遊擊
王忠張守印等安派西面遊擊白安賀人龍等安派東面
副將李昇并立功自贖遊擊亢養鯤遊擊和應詔猛如虎
虎大威韓斗都司王國臣等安派南面排列并并職帶領
軍門標下都司馬首魁張世柱旗鼓守備鮑天爵巡捕孫
繼善大旗溫承胤守備周鴻訓趙良賓原任錦衣衛王位
民等職標下副將尤人龍馮世經叅遊都手周一新閻智
晉叔望張萬丁世貴尤忠劉進賢李登胡國安金科沙中
金青山等提調參面往來嚴督各營齊攻自卯至酉唯南

面最衝賊之矢石往下射打如雨職復傳令自副叅而下
不用命者立斬適有家丁王盈回顧不前職卽梟示警衆
職乃身先將士臨城射打竟日被矢中傷職右腹下入骨
斷筋已成廢人諸將見之無不涕零職子副將尤人龍脚
面亦被輕傷職嚴督攻打安措營火黑夜猶緊貳拾玖日
攻打如故職思攻無火器城難頻破壞攻無糧利在速戰
是日黃昏嚴督各將速攻自酉至亥約叅鼓時同監視標
下把牌王承詔硬弓駱文昇大旗宇備趙宇智李宇義督
遊擊王忠等親領官丁從西面架梯直上拚命先登矢石
不顧城上賊衆繞城拒堵官丁奮砍落城開門擁殺賊多
竄東南職扶檣上馬統率官丁追殺賊拚命迎敵撲開東
南貳門各營內外互殺彼此夾攻暮夜衝鋒賊間有且戰